


宋六十一名家詞




833.151

781

3:5



3 0610 4721 7



第一輯

第四十八種

宋六十一名家詞

戊集

明·毛子晉輯

據汲古閣刊本排印
貝葉山房張氏藏版

A 211914

本書封面題簽：盧冀野先生

蘆川詞一卷

張元幹

蘆川詞

目錄

賀新郎二調	滿江紅一調	蘭陵王二調
念奴嬌六調	石州慢二調	永遇樂二調
八聲甘州二調	水調歌頭十四調	風流子一調
魚遊春水一調	寶鼎現一調	祝英臺近一調
朝中措一調	蝶戀花一調	沁園春二調
臨江仙四調	醉落魄四調	南歌子四調
卜算子四調	浣溪紗十五調	柳梢青二調
醉花陰二調	長相思令二調	如夢令三調
春光好二調	虞美人一調	青玉案七調
點絳脣九調	虞美人三調	漁家傲三調
謁金門三調	瑞鷓鴣二調	好事近四調
怨王孫二調	喜遷鶯令一調	鷓鴣天一調
喜遷鶯慢一調	鷓鴣天一調	憶秦娥一調
明月逐人來一調	小重山一調	上西平一調
春光好二調	清平樂二調	菩薩蠻六調

宋六十名家詞

二

樓上曲二調	豐莢黃三調	滿庭芳四調
瑞鶴仙二調	瑞臺第一層二調	望海潮二調
十月桃二調	感皇恩四調	夏雲峯一調
千秋歲一調	水龍吟一調	南鄉子一調
捲珠簾一調	醉蓬萊一調	驪頭泉一調
天仙子一調	鵲橋仙一調	漁父家風一調
生查子一調	減字木蘭花一調	眼兒嬌一調
昭君怨一調	夜遊宮一調	綵鸞歸令一調
江神子一調	西江月一調	訴衷情一調
採桑子一調	菩薩蠻二調	浣溪紗一調
好事近一調	南歌子一調	醉花陰一調
點絳脣一調	花心動一調	蕙山溪一調
踏莎行一調		

蘆川詞

宋 張元幹

賀新郎（送胡邦衡待制赴新州）

夢繞神州路。悵秋風、連營畫角。故宮離黍。底事崑崙傾砥柱。九地黃流亂注。聚萬落千村狐兔。天意從來高難問。況人情老易悲難訴。更南浦、送君去。涼生岸柳催殘暑。耿斜河、疏星淡月。斷雲微度。（二作雨）萬里江山知何處。回首對牀夜語。雁不到、書成誰與。目盡青天懷今古。肯兒曹恩怨相爾汝。舉大白、聽金縷。

又（寄李伯紀丞相）

曳杖危樓去。斗垂天、滄波萬頃。月流煙渚。掃盡浮雲風不定。未放扁舟夜渡。宿雁落寒蘆深處。悵望關河空弔影。正人間、鼻息鳴鼙鼓。誰伴我、醉中舞。十年一夢揚州路。倚高寒、愁生故國。氣吞驕虜。要斬樓蘭三尺劍。遺恨琵琶舊語。漫暗澀銅華。（選一作拭）塵土。喚取謫仙平章看。過苕溪、尚許垂綸否。風浩蕩、欲飛（二作輕）舉。

滿江紅（自豫章阻風吳城山作。或作春暮誤。或誤入片玉集。）

春水迷天。桃花浪、幾番風惡。雲乍起、遠山遮盡。晚風還作。綠徧芳洲生杜若。楚帆帶雨煙中落。傍向來、沙嘴共停橈。傷飄泊。寒猶在、衾偏薄。腸欲斷、愁難著。倚篷窗、無寐。引杯孤酌。寒食清

明都過卻。最憐輕負年時約。想小樓終日望歸舟。人如削。

蘭陵王（春恨）

卷珠箔。朝雨輕陰乍閣。闌干外。煙柳弄晴。芳草侵階映紅藥。東風妬花惡。吹落梢頭嫩萼。屏山掩。沈水倦熏。中酒心情怕杯勺。尋思舊京洛。正年少。疏狂歌笑迷著。障泥油壁。催梳掠。曾馳道同載。上林攜手。燈夜初過。早共約。又爭信。漂泊。寂寞念行樂。其粉淡衣襟。音斷絃索。瓊枝璧月春如昨。悵別後華表。那回雙鶴。相思除是。向醉裏暫忘卻。

又

綺霞散。空碧留晴向晚。東風裏。天氣困人。時節鞦韆閉深院。簾旌翠波颭。窗影殘紅一線。春光巧。花臉柳腰。勾引芳菲鬧鶯燕。閑愁費消遣。想蛾綠輕暈。鸞鑑新怨。單衣欲試寒猶淺。羞衾鳳空展。塞鴻難託。誰問潛寬舊帶眼。念人似天遠。迷戀畫堂宴。看最樂王孫。濃豔爭勸。蘭膏寶篆春宵短。擁檀板低唱。玉杯重暖。衆中先醉。慢倚檻。早夢見。

念奴嬌

江天雨霽。正露荷擎翠。風槐搖綠。試問秦樓今夜裏。愁到闌干幾曲。笑撚黃花。重題紅葉。無奈歸期促。暮雲千里。桂花初綻寒玉。有誰伴我淒涼。除非分付與。杯中醺醖。水本無情。山又遠。回首煙波雲木。夢繞西園。魂飛南浦。自古情難足。舊遊何處。落霞空映。孤鷺。

又（丁卯上巳，燕集葉尚書菴，宣海棠，卽席賦之）

蕊香深處，逢上已，生怕花飛紅雨。萬點胭脂遮翠袖，誰識黃昏凝佇。燒燭呈妝，傳杯繞檻，莫放春歸去。垂絲無語，見人卻似羞妒。修禊當時今日，羣賢絃管裏，英姿如許。寶曆羅衣應未有，許多陽臺神女。氣湧三山，醉聽五鼓，休更分今古。壺中天地，大家著意留住。

又（代洛濱次石林韻）

吳淞初冷，記垂虹南望，殘日西沈。秋入青冥三萬頃，蟾影吞盡湖陰。玉斧爲誰，冰輪如許，宮闕想寒深。人間奇觀，古今豪士悲吟。蒼弁丹頰仙翁，淮山風露底，曾賦幽尋。老去專城仍好客，時擁歌吹登臨。坐揖龍江，舉杯相屬，桂子落波心。一聲猿嘯，醉來虛籟千林。

又（題徐明叔海月吟笛圖）

秋風萬里，滿銀潢清影，冰輪寒色。八月靈槎乘興去，織女機邊爲客。山擁雞林，江澄鴨綠，四顧滄溟窄。醉來橫吹，數聲悲憤誰測。飄蕩貝闕珠宮，羣龍驚睡起，馮夷波激。雲氣蒼茫吟嘯處，鼉吼鯨奔天黑。回首當時，蓬萊方丈，好箇歸消息。而今圖畫，慢教千甲傳得。

又

寒綃素壁，露華濃羣玉，峯巒如洗。明鏡池開秋水淨，冷浸一天空翠。荷芰波生，菰蒲風動，驚起魚龍戲。山河影裏，十分光照人世。誰似老子癡頑，胡牀欹坐，自引壺觴醉。醉裏悲歌歌未徹。

屋角烏飛星墜。對影三人停杯一問。誰解騎鯨意。玉京何處。翠樓空鎖十二。

又（己卯中秋和陳丈少卿韻）

垂虹望極。掃太虛纖翳。明河翻雪。一碧天光波萬頃。湧出廣寒宮闕。好事浮家。不辭百里。俱載如花嬾。琴高雙鯉。鼎來同醉孤絕。浩蕩今夕風煙。人間天上。別似尋常月。陶冶三高千古恨。賞我中秋清節。八十仙翁。雅宜圖畫。寫取橫江楫。平生奇觀。夢回猶竦毛髮。

石州慢

寒水依痕。春意漸回。沙際煙闊。溪梅晴照。生香冷蕊。敗枝爭發。天涯舊恨。試看幾許消魂。長亭門外山重疊。不盡眼中青。是愁來時節。情切。畫樓深閉。想見東風。暗銷肌雪。辜負枕前雲雨。尊前花月。心期切處。更有多少淒涼。殷勤留與歸時說。到得再相逢。恰經年離別。

又（己酉秋吳興舟中）

雨急雲飛。瞥然驚散。暮天涼月。誰家疏柳。低迷幾點流螢。明滅夜帆風駛。滿湖煙水蒼茫。菰蒲零亂。秋聲咽。夢斷酒醒時。倚危檣。清絕。心折長庚光怒。羣盜縱橫。逆胡猖獗。欲挽天河一洗。中原膏血。兩宮何處。塞垣祗隔長江。唾壺空擊悲歌缺。萬里想龍沙。泣孤臣吳越。

永遇樂（宿鷗盟軒）

月仄金盆。江縈羅帶。涼颼天際。摩詰丹青。營邱平遠。一望窮千里。白鷗盟在。黃梁夢破。投老此

心如冰。耿無眠。披衣顧影。乍聞繞階絡緯。百年倦客。三生習氣。今古到頭誰是。夜色蒼茫。浮雲滅沒。舉世方熟寐。誰人著眼。放神八極。逸想寄塵寰外。獨凭闌。雞鳴日上海山霧起。

又（爲洛濱橫山作）

飛觀橫空。衆山繞甸。江面相照。曲檻披風。虛簷挂月。據盡登臨要。有時巾屨。訪公良夜。坐我半天林杪。攬浮邱飄飄衣袂。相與似遊蓬島。主人勝度。文章英妙。合住北屏西沼。何事十年風灑露沐。不厭江山好。曲屏端有吹簫人在。同倚暮雲清曉。乘除了。人間寵辱。付之一笑。

八聲甘州（陪筠翁小酌橫山閣）

倚凌空。飛觀展營邱。臥軸恍移時。漸微雲點綴。參橫斗轉。野闊天垂。草樹繁迴。鳥嶼杳竊數峯低。共一尊明月。顧影爲誰。俯仰乾坤。今古正嫩涼生處。濃露初霏。據胡牀殘夜。唯我與公知。念老去風流未減。見向來人物幾興衰。身常健。何妨遊戲。莫問棲遲。

又（西湖有感寄劉晦齋）

記當年。共飲醉畫船。搖碧宵花釵。問蒼顏華髮。煙蓑雨笠。何事重來。看盡人情物態。冷眼只堪。哈賴有西湖在。洗我塵埃。夜久波光。山色間淡妝濃抹。冰鑑雲開。東湖頭千丈。江海兩崔嵬。曉涼生荷香撲面。洒天邊風露。遍襟懷。誰同賞。通宵無寐。斜月低回。

水調歌頭（同徐師川泛太湖舟中作）

落景下青嶂。高浪卷滄洲。平生頗慣江海。掀舞木蘭舟。百二山河空壯。底事中原塵漲。喪亂幾時休。澤畔行吟處。天地一沙鷗。想元龍猶高臥。百尺樓。臨風酹酒堪笑。談話覓封侯。老去英雄不見。惟與漁樵爲伴。回首得無憂。莫道三伏熱。便是五湖秋。

又（和鄒林居士中秋）

閨餘有何好。一歲兩中秋。滕王高閣曾醉。月湧大江流。今夜釣龍臺上。還是當時逢閨。佳句記英遊。看山兼看月。登閣復登樓。別離久。今古恨。大刀頭。老來常是清夢。宛在舊神州。遐想薌林風味。甕裏自傾春色。不用貰貂裘。笑我成何事。搔首慢私憂。

又（陪福帥壽集口占以授官奴）

縹緲九重開。壯觀在人間。涼飈乍起四圍。晴黛入闌干。已過中秋時候。便是菊花重九。爲壽一尊歡。今古登高意。玉帳正清閒。引三巴。連五嶺。控百蠻。元成小隊舊遊。曾記並龍山。閩嶠尤寬南顧。閒道天邊雨露。持橐詔新頒。且擁笙歌醉。廊廟更徐還。

又

平日幾經過。重到更留連。黃塵烏帽覺來。眼界忽醒然。坐見如雲秋稼。莫問雞蟲得失。鴻鵠下翩翩。四海九州大。何地著飛仙。吸湖光。吞蟾影。倚天圓。胸中萬頃空曠。清夜燭無眠。要識世間閒處。自有尊前深趣。且唱釣魚船。調鼎他年事。妙手看烹鮮。

又

雨斷翻驚浪。山暝擁歸雲。麥秋天氣聊泛。征棹泊江村。不羨腰間金印。卻愛吾廬高枕。無事閉柴門。搔首煙波上。老去任乾坤。白綸巾。玉麈尾。一杯春。性靈陶冶我輩。猶要箇中人。莫變姓名吳市。且向漁樵爭席。與世共浮沈。目送飛鴻去。何用畫麒麟。

又

露下菱歌遠。螢傍藕花流。臨溪堂上望中。依舊柳邊洲。晚暑冰肌沾汗。新浴香綿撲粉。湘簾月華浮。長記開朱戶。不寐待歸舟。恍重來。思往事。攪離愁。天涯何處未應。容易此生休。莫問吳霜點鬢。細與蠻牋封恨。相見轉綢繆。雲雨陽臺夢。河漢鵲橋秋。

又（癸酉虎邱中秋）

萬里冰輪滿。千丈玉盤浮。廣寒宮殿西望。湖海冷光流。掃盡長空纖翳。散亂疏林清影。風露迫人愁。徐步行歌去。危坐□眠休。問孤篷。緣底事。苦淹留。倦遊回首向來。雲臥兩星周。此夜此生長好。明月明年何處歸興。在南州。老境一僮父。異縣四中秋。

又（贈汪秀才）

袖手看飛雪。高臥過殘冬。飄然底事春到。先我逐孤鴻。挾取筆端風雨。快寫胸中邱壑。不肯下樊籠。大笑了今古。乘興便西東。一尊酒。知何處。又相逢。奴星結柳與君同。送五家窮。好是滿

封千戶。正恐樓高百尺。湖海有元龍。目光在牛背。馬耳射東風。

又

今夕定何夕。秋水滿東甌。悲涼懷抱何事。還倍去年愁。萬里碧空如洗。寒浸十分明月。簾捲玉波流。非是經年別。一歲兩中秋。坐中庭。風露下。冷飈颭。素娥無語相對。尊酒且遲留。琴罷不堪幽怨。遙想三山影外。人倚夜深樓。矯首望霄漢。雲海路悠悠。

又（爲趙端禮作）

最樂賢王子。今歲好中秋。夜深珠履舉杯。相屬盡名流。宿雨乍開銀漢。洗出玉蟾秋色。人在廣寒遊。浩蕩山河影。徧照岳陽樓。露華濃。君恩重。判扶頭。霓旌星節。已隨絲管下皇州。滿座燭光花豔。笑罨烏巾同醉。誰問負薪裘。月轉簷牙曉。高枕更無憂。

又（追和）

舉手釣鼈客。削迹種瓜侯。重來吳會三伏。行見五湖秋。耳畔風波搖蕩。身外功名飄忽。何路射旄頭。孤負男兒志。悵望故園愁。夢中原。揮老淚。徧南州。元龍湖海豪氣。百尺臥高樓。短髮霜黏兩鬢。清夜盆傾一雨。喜聽瓦鳴溝。猶有壯心在。付與百川流。

又

放浪形骸外。憔悴山澤癯。倒冠落佩此心。不待白髭鬚。聊復脫身鷄鷺。未暇先尋水竹。矯首漢

庭疏長夏。啖丹荔。兩紀傲閑居。忽風飄。連雨打。向西湖。藕花深處。尙能同載麴。生無聽子談。天舌本澆我書。空胸次醉臥。踏冰壺。畢竟凌煙像。何似輞川圖。

又（丁丑春與鍾離少翁張元鑾登垂虹）

挂策松江上。舉酒醉三高。此生飄蕩往來。身世兩徒勞。長羨五湖煙艇。好是秋風鱸膾。笠澤久蓬蒿。想像英靈在。千古傲雲濤。俯滄波。吞空曠。恍神父。解衣盤礴。政須一笑。屬奇曹。洗盡人間塵土。掃去胸中冰炭。痛飲讀離騷。縱有垂天翼。何用釣連鰲。

又（送呂居仁召赴行在所）

戎虜亂中夏。星歷一周天。干戈未定悲咤。河洛尙腥羶。萬里兩宮無路。政仰君王神武。願數中興年。吾道尊洙泗。何暇議伊川。呂公子。三世相。在凌煙。詩名獨步。焉用兒輩更毛箋。好去承明讜論。照映金猊帶穩。恩與荔枝偏。回首東山路。池閣醉雙蓮。

風流子（政和間過延平雙谿閣落成席上賦）

飛觀插彫梁。憑虛起縹緲。五雲鄉。對山滴翠嵐。兩眉濃黛。水分雙派。滿眼波光。曲闌外。汀煙輕冉冉。莎草細茫茫。無數釣舟。最宜煙雨。有如圖畫。渾似瀟湘。使君行樂處。秦箏弄哀怨。雲鬢分行。心醉一缸春色。滿座凝香。有天涯倦客。尊前回首聽徹伊州。惱損柔腸。不似碧潭雙劍。猶解相將。

魚遊春水

芳洲生蘋芷。宿雨收晴浮暖翠。煙光如洗。幾片花飛點淚。清鏡空餘白髮添。新恨誰傳紅綾寄。溪漲岸痕。浪吞沙尾。老去情懷易醉。十二闌干慵徧倚。雙鳧人慣風流。功名萬里。夢想濃妝碧雲邊。目斷孤帆夕陽裏。何時送客。更臨春水。

寶鼎現（筠翁李似之作此詞見招因賦其事使歌之者想像風味如到山中）

山莊圖畫錦囊吟詠。胸中邱壑。年少日如虹豪氣。吐鳳詞華。渾忘卻。便袖手向巖前溪畔。種滿煙梢霧籜。想別墅平泉。當時草木。風流如昨。瘦藤閑倚看鉏藥。雙芒屨雨後常著。目送處飛鴻滅沒。誰問蓬蒿爭燕雀。乍霽月望松雲南渡。短艇欹沙夜泊。正萬里青冥。千林虛籟。從渠繒繳。攜幼尙有筠丁。誰會得人生行樂。岸幘綸巾歸去。深戶香迷翠幕。恐未免上凌煙閣。好在秋天鶚。念小山叢桂。今宵狂客。不勝杯勺。

祝英臺近

枕霞紅。釵燕墜。花露殢雲鬢。粉淡香殘。猶帶宿醒睡。畫簷紅日三竿。慵窺鸞鑑。長是倚春風無力。又經歲。玉腕條脫輕鬆。羞郎見憔悴。何事秋來。容易又分袂。可堪疏雨梧桐。空階絡緯。背人處偷彈珠淚。

朝中措（次聽父韻）

花陰如坐木蘭船。風露正娟娟。翠蓋匝庭芳影，青蛟平地飛涎。春撩狂興，昏迷痛飲，中聖中賢。攜取一枝同夢，從他五夜如年。

蝶戀花

窗暗窗明昏又曉。百歲光陰，老去難重少。四十歸來猶賴早。浮名浮利都經了。時把青銅開自照。華髮蒼顏，一任傍人笑。不會參禪并學道。但知心下無煩惱。

又

燕去鶯來春又到。花落花開，幾度池塘草。歌舞筵中人易老。閉門打坐安閑好。敗意常多如意少。著甚來由，入鬧尋煩惱。千古是非渾忘了。有時獨自掀髯笑。

沁園春（紹興丁巳五月六夜夢與一道人對歌數曲遂成此詞）

神水華池，汞鉛凝結，虎龍往來。問子前午後，陽銷陰長，自然爐鼎，何用安排。靈寶玄門，煙蘿真境，三日庚生兌戶開。泥丸透，盡周天火候，平步仙階。蓬萊直上瑤臺，看海變桑田，飛暮埃。念塵勞良苦，流光易度，明珠誰得。白骨成堆，位極人臣，功高今古。總蹈危機，吞禍胎。爭知我，辦青鞵布襪，雁蕩天台。

又

欹枕深軒，散帙虛堂，畏景屢移。漸披襟臨水，搯牀就月，蓮香拂面，竹色侵衣。壓玉爲醪，折荷爲

醜臥看銀潢是四垂。人歸後。任飢蟬自嘯。宿鳥相依。癡兒莫蹈危機。悟三十九年都盡非。任紆朱拖紫。圍金珮玉。青錢流地。白璧如坻。富貴浮雲。身名零露。事事無心歸便歸。秋風動。正吳松月冷。尊長鱸肥。

臨江仙(送王叔濟)

玉立清標消晚暑。胸中一段冰壺。畫船歸去醉歌珠。微雲收未盡。殘月炯如初。鷺鷥行間催闊步。秋來乘興鳧趨。煩君爲我問西湖。不知疏影畔。許我結茅無。

又(茶蘼有感)

鶯喚屏山驚睡起。嬌多須要郎扶。茶蘼斗帳罷熏爐。翠穿珠落索。香泛玉流蘇。長記枕痕銷醉色。日高猶倦妝梳。一枝春瘦想如初。夢迷芳草路。望斷素鱗書。

又(趙端禮重陽後一日置酒坐上賦)

十日籬邊猶袖手。天教冷地藏香。王孫風味最難忘。逃禪留坐客。度曲出宮妝。判卻爲花今夜醉。大家且泛鵝黃。人心休更問炎涼。從渠簪髮短。還我引杯長。

又(送宇文德和被召赴行在所)

露坐榕陰須痛飲。從渠疊鼓頻催。暮山新月兩徘徊。離愁秋水遠。醉眼曉帆開。泛宅浮家遊戲去。流行坎止忘懷。江邊鷗鷺莫相猜。上林消息好。鴻雁已歸來。

醉落魄

浮家泛宅舊遊記。雪溪蹤跡。此生已是天涯隔。投老誰知。還作三吳客。故人怪我疎髯黑。醉來猶似丁年日。光陰未肯成虛擲。蜀魄聲中。著處有春色。

又

綠枝紅萼江南芳。信年年約。竹簾路轉溪橋角。晴日烘香的。饒疏籬落。玉臺粉面鉛花薄。畫堂長記深羅幕。惜花老去情猶著。客裏驚春。生怕東風惡。

又

一枝冰萼鬢雲低。度橫波約。醉扶曾冒烏巾角。長是春來腸斷。寶釵落。羅衣乍怯春風薄。夜深花困遮垂幕。不堪往事尋思著。休問尊前客。惡主人惡。

又

雲鴻影落。風吹小艇欹沙泊。津亭古木濃陰合。一枕灘聲。客睡何曾著。天涯萬里情懷惡。年華垂暮猶離索。佳人想見猜疑錯。莫數歸期。已負當時約。

南歌子（中秋）

涼月今宵滿。晴空萬里寬。素娥應念老夫閑。特地中秋著意照人間。香霧雲鬟溼。清輝玉臂寒。休教凝佇向更闌。飄下桂花開早大家看。

又

遠樹留殘雪。寒江照晚晴。分明江上數峯青。倚檻舊愁新恨一時生。春意來無際。歸舟去有程。道人元自沒心情。楚夢只因沈醉等閑成。

又

玉露團寒菊。秋風入敗荷。綠牆南畔曲池渦。天迴遙岑倒影落層波。月轉簷牙短。更傳漏箭多。醉來歸去意如何。只爲地偏心遠慣絃歌。

又

桂魄芬餘暈。檀香破紫心。高鬟鬆綰鬢雲侵。又被蘭膏香染色沈沈。指印纖纖粉。釵橫隱隱金。更闌雲雨鳳帷深。長是枕前不見殢人尋。

卜算子(梅)

的皪數枝斜。冰雪縈餘態。燭外尊前滿眼春。風味年年在。老去惜花深。醉裏愁多睺。冷蕊孤芳底處愁。少箇人人戴。

又

涼氣入熏籠。暗影欹花砌。紫玉誰人三弄寒。吹斷江梅意。花底溼春衣。隔坐風輕遞。卻笑笙簫縵嶺人。明月偷垂淚。

又

風露溼行雲。沙水迷歸艇。臥看明河月滿空。斗挂蒼山頂。萬古只青天。多事悲人境。起舞聞雞酒未醒。潮落秋江冷。

又

芳信看寒梢。影入花光畫。玉立風前萬里春。雪豔江天夜。誰折暗香來。故把新箋寫。記得個人並照時。鬢亂斜枝惹。

浣溪紗

曲室明窗燭吐光。瓦爐灰暖炷瓢香。夜闌茗椀間飛觴。坐穩蒲團憑棐几。重餘紙帳掩藜牀。箇中風味更難忘。

又

一枕秋風兩處涼。雨聲初歇漏聲長。池塘零落藕花香。歸夢等閑歸燕去。斷腸分付斷雲行。畫屏今夜更思量。

又（王仲時席上賦木犀）

翡翠釵頭綴玉蟲。秋蟾飄下廣寒宮。數枝金粟露華濃。花底清歌生皓齒。燭邊疏影映酥胸。惱人風味冷香中。

又（武林送李似表）

燕掠風檣款款飛。艷桃穠李鬧長隄。騎鯨人去曉鶯啼。
可意湖山留我住。斷腸烟水送君歸。
三春不是別離時。

又

雲氣吞江卷夕陽。白頭波浪電飛忙。奔雷驚雨漲胡牀。
玉節故人同壯觀。錦囊公子更平章。
榕陰歸夢十分涼。

又

山繞平湖波撼城。湖光倒影浸山青。水晶樓下欲三更。
霧柳暗時雲度月。露荷翻處水流螢。
蕭蕭散髮到天明。

又

目送歸舟鐵甕城。隔江想見蜀山青。風前團扇僕頻更。
夢裏有時身化鶴。人間無數草爲螢。
此時山月下樓明。

又（薔薇水）

月轉花枝清影疏。露華濃處滴真珠。天香遺恨冒花鬚。
沐出烏雲多態度。暈成蛾綠費工夫。
歸時分付與妝梳。

又（鴛梅香）

花氣天然百和芬。仙風吹過海中春。龍涎沈水總鎖魂。清潤巧縈金縷細。氤氳偏傍玉肌溫。別來長是惜餘熏。

又（范才元自釀色香玉如直與綠萼梅同調。宛然京洛氣味也。因名曰萼綠春。且作一首。謬以竊嘗爲吹笙云）

萼綠華家萼綠春。山瓶何處下青雲。濃香氣味已醺人。竹葉傳杯驚老眼。松醪題賦倒綸巾。須防銀字暖朱脣。

又（戲簡宇文德和求拈香）

花氣蒸濃古鼎煙。水沈春透露華鮮。心清無暇數龍涎。乞與病夫僧帳座。不妨公子醉茵眠。普熏三界掃腥膻。

又（求年例買餘香）

花氣熏人百和香。少陵佳句是仙方。空教蜂蝶爲花忙。和露摘來輕換骨。傍懷開處惱迴腸。去年時候入思量。

又

殘臘晴寒出衆芳。風流勾引破春光。年年長爲此花忙。夜久莫教銀燭地。酒邊何似玉臺妝。

冰肌溫處覓餘香。

又

槩几明窗樂未央。熏爐茗椀是家常。客來長揖對胡牀。蟹眼湯深輕泛乳。龍涎灰暖細烘香。爲君行草寫秋陽。

又（書大同驛壁）

榕葉桃榔驛枕谿。海風吹斷瘴雲低。薄寒初覺到征衣。歲晚可堪歸夢遠。愁深偏恨得書稀。荒庭日脚又垂西。

柳梢青

海山浮碧。細風絲雨。新愁如織。慵試春衫。不禁宿酒。天涯寒食。歸期莫數芳辰。誤幾度回廊。夜色入戶。飛花隔簾。雙燕有誰知得。

又

小樓南陌翠幃金。勒誰家春色。冷雨吹花。禁煙怯柳。傷心行客。少年百萬呼盧。擁越女吳姬。共擲被底香濃。尊前燭滅。如今消得。

醉花陰

紫樞澤笏趨龍尾。平入鈞衡位。春殿聽宣麻。爭喜登庸。何似今番喜。崑臺宜有神仙裔。弈世

貂蟬貴。玉砌長闌芽。好擁笙歌。長向花前醉。

又

翠箔陰陰籠畫閣。昨夜東風惡。芳徑滿香泥。南陌東郊。惆悵妨行樂。傷春比似年時惡。潘鬢新來薄。何處不禁愁。雨滴花腮。和淚臙脂落。

長相思令

香暖幃。玉暖肌。嬌臥嗔人來睡遲。印殘雙黛眉。蟲聲低。漏聲稀。驚枕初醒燈暗時。夢人歸未歸。

又

花下愁。月下愁。花落月明人在樓。斷腸春復秋。從他休。任他休。如今青鬢不自由。看看天盡頭。

如夢令(七夕)

雨洗青冥風露。雲外雙星初度。乞巧夜樓空。月妒回廊私語。凝佇凝佇。不似去年情緒。

又

潮退江南晚渡。山閣冰西煙雨。天氣十分涼。斷送一年殘暑。歸去歸去。香霧曲屏深處。

又

臥看西湖煙渚。綠蓋紅妝無數。簾捲曲闌風。拂面荷香吹雨。歸去歸去。笑損花邊鷗鷺。

春光好

疏雨洗。細風吹。淡黃時。不分小亭芳草綠。映簷低。樓下十二層梯。日長影裏鶯啼。倚徧闌干看盡柳。憶腰肢。

又

吳綾窄。藕絲重。一鉤紅。翠被眠時要人暖。著懷中。六幅裙窄輕風。見人遮盡行蹤。正是踏青天氣好。憶弓弓。

虞美人

開殘桃李春方到。誰送東風早。揶揄幽徑踏餘花。却對綠陰青子問年華。迢迢雲水橫清淺。不遣愁眉展。數竿脩竹自橫斜。猶有小窗朱戶似儂家。

青玉案（燕趙端禮堂成）

華裾玉轡青絲鞵。記年少。金吾從。花底朝回珠翠擁。曉鐘初斷。宿醒猶帶。綠鎖窗中夢。天涯相遇鞭鸞鳳。老去堂成更情重。月轉簷牙雲繞棟。涼吹香霧。酒迷歌扇。春筍傳杯送。

又（再和）

王孫陌上春風輕。蕊珠宴。雲軿從。歸去笙歌常醉擁。蠟殘花炬。月侵冰簾。慣作涼堂夢。玉人

勸客釵斜鳳。條脫擎杯腕嫌重。燕子入簾飛盡棟。雨餘深院。漏催清夜。更軋秦箏送。

又（生朝）

花王獨占春風遠。看百卉芳菲徧。五福長隨今日宴。粉光生豔。寶香飄霧。方響流蘇顫。壽祺堂上脩篴畔。乳燕雙雙賀新院。玉笋明年何處勸。旌幢滿路。貂蟬宜面。歸覲黃金殿。

又（筠翁生朝）

水芝香遠搖紅影。泛瑞靄橫山頂。縹緲笙歌雲不定。玉鉤斜挂。素蟾初滿。醉愜浮瓜冷。庭蘭戲彩傳金鼎。小袖青衫更輝映。誰道筠溪歸計近。秋風催去。鳳池難老。長把中書印。

又（生朝）

銀潢露洗冰輪皎。謫仙下蓬萊島。簾捲橫山珠翠繞。生朝香霧。玳筵絲管。長醉壺天曉。金鑾夜鎖麻新草。入輔明光拜元老。看取明年人總道。中興賢相。太平時世。分外風光好。

又

月華冷沁花梢露。芳意戀香肌住。心字龍涎饒濟楚。素馨風味。碎瓊流品。別有天然處。圍爐屈曲宜深炷。留取春光向朱戶。綠綺聲中誰暗許。小窗歸去。夢回猶記。金鼎分雲縷。

又（賀方回所作。世間和韻者多矣。余經行松江何首回。念欲下一轉語。了無好句。此來偶有得。當與吾宗

椿老子。載酒浩歌西湖南山間。寫我滯思。二公不可不入社也。）

平生百繞垂虹路。看萬頃翻雲去。山澹夕暉帆影度。菱歌風斷。襪羅塵散。總是關情處。少年
陳迹今遲暮。走筆猶能醉詩句。花底目成心暗許。舊家春事。覺來客恨。分付疏篷雨。

點絳脣（丙寅秋社前一日溪光亭大雨作）

山暗秋雲。暝鴉接翅啼榕樹。故人何處。一夜溪亭雨。夢入新涼。只道消殘暑。還知否。燕將雛
去。又是流年度。

又

水驛凝霜夜。帆風駛潮生曉。酒醒寒悄。枕底波聲小。好去歸舟。有箇人風調。君行了。此歡應
少。索共梅花笑。

又

春曉輕雷。采蘋洲上清明雨。亂雲遮樹。暗澹江村路。今夜歸舟。綠潤紅香處。遙山暮。畫樓何
許。喚取潮回去。

又

畫閣深闌。暖紅光裏芳林影。暗香成陣。上下花相映。倒挂疏枝。月落參橫冷。休裝景。要人酒
醒。除是花枝並。

又（生朝）

嵩洛雲煙。問生真相者英裔。要知鮐背難老。中和氣。報道玉堂已草調元制。華夷喜。繡裳貂珥。便向東山起。

又（皇洛濱筠谿二老）

清夜沈沈。暗蛩啼處簷花落。乍涼簾幕。香繞屏山角。堪恨歸鴻。情似秋雲薄。書難託。儘教寂寞。忘了前時約。

又

醉泛吳松。小舟誰怕東風大。舊時經過。曾向垂虹臥。月淡霜天。今夜空清坐。還知麼。滿斟高。和只有君知我。

又

減塑冠兒。寶釵金縷雙綏結。怎教寧帖。眼兒惱裏劣。韻底人人。天與多磨折。休分說。放燈時。節開了花和月。

又

水鷁風帆。兩眉只解相思皺。悄然難受。教我怎唧啾。就只這難依口。待得書來。不管歸時瘦。嬌癡後。是事攔。

虞美人

廣寒蟾影開雲路。目斷愁來處。菊花輕泛玉杯空。醉後不知星斗亂西東。今宵入夢陽臺雨。誰忍先歸去。酒醒長是五更鐘。休念舊遊吹帽幾秋風。

又

西郊追賞尋芳處。聞道衝寒去。雨肥紅綻向南枝。歲晚纔開應是恨春遲。天涯樂事王孫貴。花底還君醉。有人風味勝疏梅。醉裏折花歸去更傳杯。

又

菊坡九日登高路。往事知何處。陵遷谷變總成空。回首十年秋思吹臺東。西窗一夜蕭蕭雨。夢繞中原去。覺來依舊畫樓鐘。不道木樨香撼海山風。

漁家傲（題玄真子圖）

釣笠披雲青障繞。檣頭雨細春江渺。白鳥飛來風滿棹。收綸了。漁童拍手樵青笑。明月太虛同一照。浮家泛宅忘昏曉。醉眼冷看城市鬧。煙波老。誰能惹得閑煩惱。
（若溪漁隱云：張仲宗有漁家傲詞，余往歲在錢塘與仲宗從游甚久，仲宗手寫此詞相示，云舊所作也。其詞第二句元是檣頭雨細春江渺，余謂仲宗曰：檣頭雖是船名，今以雨觀之，語晦而病，因為改作綠蘆雨細，仲宗笑以爲然。）

又

樓外天寒山欲暮。溪邊雪靄藏雲樹。小艇風斜沙嘴露。流年度。春光已向梅梢住。短夢今宵

還到否。葦村四望知何處。客裏從來無意緒。催歸去。故園正要鶯花主。

又（奉陪富公季申探梅有作）

寒食西郊湖畔路。天低野闊山無數。路轉岡斜花滿樹。絲吹雨。南枝占得春光住。藉草攜壺花底去。花飛酒面香浮處。老手調羹當獨步。須記取。坐中都是芳菲侶。

謁金門（或刻秦處度）

鶯鶯渚。春漲一江花雨。別岸數聲初過櫓。晚風生碧樹。艇子相呼相語。載取暮愁歸去。寒食煙村芳草路。愁來無著處。

又（道山亭餞張樵老赴行在）

風露底。石上岸巾愁起。月到房心天似水。亂峯清影裏。此去登瀛須記。今夕道山同醉。春殿明年人共指。玉皇香案吏。

又（送康伯檣）

清光溢。影轉畫簷涼入。風露一天星斗溼。無雲天更碧。滿引送君何惜。記取吾曹今夕。目斷秋江君到日。潮來風正急。

瑞鷓鴣

雛鶯初囀鬬尖新。雙蕊花嬌掌上身。總解滿斟偏勸客。多生俱是綺羅人。回波偷顧輕招拍。

方響低敲更合箏。荳蔻梢頭春欲透。情知巫峽待爲雲。

又（彭德器出示胡邦衡新句次韻）

白衣蒼狗變浮雲。千古功名一聚塵。好是悲歌將酒進。不妨同賦惜餘春。風光全似中原日。臭味要須我輩人。雨後飛花知底數。醉來贏得自由身。

好事近

老去更思歸。芳草正薰南陌。上巳又逢寒食。歎三年爲客。吹花小雨溼鞦韆。閒卻好春色。天甚不憐人老。早教人歸得。

又

梅潤乍晴天。簾捲畫堂風月。珠翠共迷香霧。是長年時節。瑤池清夜宴羣仙。鸞笙未吹徹。西母醉中微笑。看蟠桃初結。

又

春色到花房。芳信一枝偏好。勾引萬紅千翠。爲化工呈巧。花姑玉貌笑東風。今朝放春早。看取鬢邊幡勝。永宜春難老。

又

斗帳炷爐熏。花露裊成薝蔔。縈透雪兒金縷。醉玉壺春色。非煙非霧鎖窗中。王孫倦遊客。不

道粉牆南畔。也有人閒得。

怨王孫

小院春晝晴窗霞透。著雨胭脂。倚風翠袖。芳意惱亂人多。暖金荷。多情不分羣葩後。傷春瘦。淺黛眉尖秀。紅潮醉臉半掩。花底重門。怨黃昏。

又（紹興乙丑春二月既望季文中置酒溪閣日暮雨過盡得雲煙變態如對營邱著色山坐客有歌戀王孫

者請予賦其情抱葉子謙爲作三弄吹雲裂石旁若無人永福前此所未見也老子於此興復不淺）

霽雨天迴平林煙暝。燈閃沙汀。水生釣艇。樓外柳暗誰家。亂昏鴉。相思怪得今番甚。寒食近。小研魚牋信。屏山半掩微醉。獨倚闌干。恨春寒。

喜遷鶯令（送何晉之大著兄趙朝歌以侑酒）

文倚馬。筆如椽。桂殿蚤登仙。舊遊冊府記當年。衰繡合貂蟬。慶天中。瞻玉座。鵷鷺正陪班。看君穩步過花甌。歸院引金蓮。

鶴冲天（呈富樞密。向亦作喜遷鶯令誤）

雲葉亂。月華光。羅幕捲新涼。玉醅初泛嫩鵝黃。花露滴秋香。地行仙。天上相。風度世間人樣。懸知洗盞徑開筵。誰醉伴禪牀。

喜遷鶯慢（鹿鳴宴作）

雁塔題名。寶津盼宴。盛事簪紳常說。文物昭融。聖代搜羅。千里爭趨丹闕。元侯勸駕。鄉老獻書。發軔龜前列。山川秀。圓觀衆多。無如閩越。豪傑姓標紅紙。帖報泥金。喜信歸來俱捷。驕馬蘆鞭。醉垂藍綬。吹雪芳□□月。素娥情厚。桂花一任郎君折。須滿引。南臺又是。合沙時節。

鷓鴣天

不怕微霜點玉肌。恨無流水照冰姿。與君著意從頭看。初見東南第一枝。人散後。雪晴時。隴頭春色寄來遲。使君本是花前客。莫怪殷勤爲賦詩。

憶秦娥

桃花萼。雨肥紅綻。東風惡。東風惡。長亭無寐。短書難託。征衫辜負深閨約。禁煙時候春羅薄。春羅薄。多應消瘦。可忺梳掠。

明月逐人來（燈夕趙端禮席上）

花迷珠翠。香飄羅綺。簾旌外。月華如水。暖紅影裏。誰會王孫意。最樂昇平景致。長記宮中五夜。春風鼓吹。遊仙夢。輕寒半醉。鳳幃未暖。歸去熏濃被。更問陰晴天氣。

小重山

誰向晴窗伴素馨。蘭芽初秀發。紫檀心。國香幽豔。最情深。歌白雪。祗少一張琴。新月冷光侵。醉時花近眼。莫頻斟。薛濤箋上。楚妃吟。空凝睇。歸去夢中尋。

上西平（一作金人捧露盤）

臥扁舟。閉寒雨。數佳期。又還是輕誤。仙姿小樓夢冷。覺來應恨我歸遲。鬢雲鬆處。枕檀斜。露泣花枝。名與利。空縈繫。添憔悴。漫孤恁。得見了。說與教知。假香倚暖。夜爐圍定。酒溫時。任他飛雪。洒江天。莫下層梯。

春光好（爲楊聰父侍兒切韻作）

花恨雨。柳嫌風。客愁濃。坐久霜刀飛碎雪。一尊同。勞煩玉指春蔥。未放筇。金盤已空。更與箇中尋尺素。兩情通。

又

寒食近。踏青時。畫堂西。可是春來偏倦繡。乍生兒。香綿輕拂臙脂。加文褱。初試班衣。悄沒工夫存問我。且憐伊。

清平樂

亂山深處。雪擁溪橋路。曉日乍明催客去。驚起玉鴉翻樹。翠衾香暖檀灰。一枝想見疏梅。憑仗東風說與。畫眉人共春回。

又

明珠翠羽。小綰同心縷。好去吳松江上路。寄與雙魚尺素。蘭橈飛取歸來。愁眉待得伊開。相

見嫣然一笑。眼波先入郎懷。

菩薩蠻

天涯客裏秋容晚。妖紅聊戲思鄉眼。一朵醉深妝。羞渠照鬢霜。開時誰斷送。不待司花共。有脚號陽春。芳菲屬主人。

又（戲呈周介卿）

拍隄綠漲桃花水。畫船穩泛東風裏。絲雨溼苔錢。淺寒生禁煙。江山留不住。卻載笙歌去。醉倚玉搔頭。幾曾知旅愁。

又（三月晦送春有集坐中偶書）

春來春去催人老。老夫爭肯輸年少。醉後少年狂。白髭殊未妨。插花還起舞。管領風光處。把酒共留春。莫教花笑人。

又

雨餘翠袖瓊眉潤。一枝想像傷春困。老眼見花時。惜花心未衰。釀成誰與醉。應把流蘇綴。淚沁枕囊香。惱儂歸夢長。

又（政和王辰東都作）

黃鸝啼破紗窗曉。蘭缸一點窺人小。春淺錦屏寒。麝煤金博山。夢回無處覓。細雨梨花溼。正

是踏青時。眼前偏少伊。

又

甘林玉蕊生香霧。遊蜂爭採清晨露。芳意著人濃。微烘曲室中。春來瀛海外。沈水迎風碎。好事付餘熏。頻分幾縷雲。

樓上曲

樓外夕陽明遠水。樓中人倚東風裏。何事有情怨別離。低鬟背立君應知。東望雲山君去路。斷腸迢迢盡愁處。明朝不忍見雲山。從今休傍曲闌干。

又

清夜燈前花報喜。心隨社燕涼風起。雲路修成寶月時。東樓悵望君先期。沆瀣秋香生玉井。畫檐深轉梧桐影。看君西去侍明光。杯中丹桂一枝芳。

荳葉黃 (唐腔也。爲伯南賦早梅復和韻)

水溪疏影竹邊春。翠岫天寒炯暮雲。雪裏精神澹佇人。隔重門。寶粟生香玉半溫。

又

疏枝冷蕊忽驚春。一點芳心入鬢雲。風韻情知似玉人。笑迎門。香暖紅爐酒未溫。

又 (見草堂別集)

輕羅團扇掩微羞。酒滿玻璃花滿頭。小板齊聲唱石州。月如鉤。一寸橫波入鬢流。

蒲庭芳(壽)

梁苑春歸。章街雪霽。柳梢花萼初萌。非煙非霧。新歲樂昇平。京兆雍容報政。金猊過九陌塵輕。朝回處。青霄路穩。黃色起天庭。東風吹綠鬢。薄羅翦綵。小綰流鶯。比渭濱甲子。尙父難兄。滿泛椒觴獻壽。班衣侍雲母分屏。明年會。雙衣對引。談笑秉鈞衡。

又(壽富樞密)

韓國殊勳。洛都西內。名園甲第相連。當年綠鬢。獨占地行仙。文彩風流瑞世。延朱履絲竹喧闐。人皆仰。一門相業。心許子孫賢。中興方慶會。再逢甲子。重數天先。問千齡誰比。五福俱全。此去沙隄步穩。調金鼎七葉貂蟬。香檀緩杯傳鸚鵡。新月正娟娟。

又(爲趙西宗外證)

玉葉聯芳。天潢分潤。壽筵長對熏風。間平襟度。濮邸行尊崇。忠孝容傳大雅。無喜恨一種寬容。芝蘭盛。綵衣嬉戲。親睦冠西宗。絲綸膺重寄。遙防遷美。本鎮恩隆。應萱堂齊福。誕月仍同。花藥香濃。氣暖凝瑞露。滿酌金鍾。龍光近。星飛驛馬。宣入嗣王封。

又

三十年來。雲游行化。草屨踏破塵沙。徧參尊宿。曾記到京華。衲子如麻似粟。誰□笑瞿老拈花。

經離亂。青山盡處。海角又天涯。今宵閑打睡。明朝粥飯。隨分僧家。把木佛燒。卻除是丹霞。擲著門徒施主。暮然箇喜捨由他。廬陵米。還知僧例。毫髮更無差。

瑞鶴仙(壽)

倚格天峻閣。舞庭槐陰轉。盆榴紅燦。香風泛簾幕。擁霞裾瓊珮。眞珠璎珞。華陽慶渥。誕蘭房流芳秀萼。有赤繩繫足。從來相問。自然媒妁。遊戲人間榮貴。道要元微。水源清濁。長生大樂。彩鸞韻。鳳簫鶴對。木公金母。子孫三世。婦姑爲壽。滿酌看千齡。舉家飛昇。玉京更樂。

又(壽)

喜西園放鑰。對燕寢香潤。棠陰寒薄。東風夜來惡。禁煙時天氣。鶯啼花落。新晴共約。怕韶光容易過。卻把銅壺緩泛。金杯袂褱。嬉遊行樂。絃索笙簧聲裏。還記蘭房。正垂羅幕。初眠柳弱。梅如豈。玉如琢。向鳳凰池上。鴛鴦影裏。他年何啻紫橐。看流芳繼踵。韋平盛傳。衆洛。

瑞臺第一層(壽)

寶曆祥開。飛練上青冥。萬里光石城形勝。秦淮風景。威鳳來翔。臘餘春色早兆。釣璜賢伊興王。對熙旦正格天同德。全魏分疆。煒煌五雲深處。化鈞獨運。斗魁旁繡裳龍尾。千官師表。萬事平章。景鍾文瑞。世醉尙方。難老金漿。慶垂裳看雲屏間坐。象笏堆牀。

又

江左風流鍾間氣。洲分二水長。鳳凰臺畔。投懷玉燕。照社神光。豈花初秀。雨散暑空。洗出秋涼。慶生日正圓蟾呈瑞。仙桂飄香。肝腸挾文。摛錦駕雲。乘鶴下鷄行。紫樞將命。紫微如綽。常近君王。舊山同梓里。荷月旦久已平章。九霞觴薦。刀圭丹餌。袞繡朝裳。

望海潮（癸卯冬爲建守趙季西賦碧雲樓）

蒼山煙澹。寒谿風定。玉簪羅帶綢繆。輕靄暮飛。青冥遠淨。珠星璧月光浮。城際涌層樓。正翠簾高捲。綠瑣低鈎。影落尊罍。氣和歌管共清遊。史君冠世風流。擁香鬢凭檻。霧鬢凝眸。銀燭暖宵。花光照席。譙門莫報更籌。逸興醉無休。賦探梅芳信。翻曲新謳。想見疏枝冷蕊。春意到沙洲。

又（爲富樞密生朝壽）

麒麟圖畫。貂蟬冠冕。青氈自屬元勳。綠野舊遊。平泉雅詠。霞舒煙捲朝昏。風月小陽春。照玳筵珠履。公子王孫。雪度崧高。影橫伊水。慶生申。早梅長醉芳尊。況中興盛際。宥密宗臣。琳館奉祠。金甌覆宇。和羹妙手還新。光射紫薇垣。看五雲朝斗。千載逢辰。開取八荒壽域。一氣轉洪鈞。

十月桃

年華催晚。聽尊前偏唱。衝暖欺寒。樂府誰知分付。點化金丹。中原舊遊何在。頻入夢老眼空潸。撩人冷蕊。渾似當時。無語低鬟。有多情多病文園。向雪後尋春。醉裏凭闌。獨步羣芳。此花風度天然。羅浮淡妝素質。呼翠鳳飛舞爛斑。參橫月落。留恨醒來滿地香殘。

又(爲富樞密)

蟠桃三熟正清霜。吹冷愛日烘香。小試芳菲時候。無限風光。洛濱老人星見。□少室雲物開祥。丹青萬彙。熊兆崑臺。鳳舉朝陽。向元樞曾輔巖廊。記名著金甌。位入中堂。夢熟鈞天。屢驚顛倒衣裳。黃髮更宜補袞。歸去定軍國平章。箴絃珠翠。蘭玉簪纓。歲歲稱觴。

感皇恩(壽)

綠髮照魁星。平康爭看錦繡肝腸。五千卷。出逢熙運。蚤侍玉皇香案。禁塗揚歷徧。紆宸眷。安養老成。十年蕭散。天要中興相公健。生朝開宴。長是通宵絃筦。藕花香不斷。南風遠。

又(壽)

年少太平時。名園甲第。談笑雍容萬鍾貴。姚黃重綻。長對小春天氣。綺羅叢裏慣。今朝醉。台榭參賢元樞虛位。壯歲青雲自曾致。流霞麟脯。難老洛濱風味。謝公須再爲蒼生起。

又(壽)

荔子著花繁。清微庭院。賀厦雙飛。畫梁燕。綺羅叢裏。百和爐煙祝願。願從今日去。身長健。檀板競催。榕陰初轉。舞袖風前翠翹顫。明年開府。錫宴金鍾宣勸。壽期朝北斗。君王眷。

又(壽)

豹尾引黃旂。宣麻金殿。雨露恩濃自天遣。綰紳交譽。最樂至誠爲善。信知宗姓喜。君王眷。寶

炬密香。玉卮波豔。醉擁笙歌夜深院。西清班近。雅稱元戎。同燕要君茅土。相貂蟬面。

夏雲峯（丙寅六月爲筠翁壽）

湧冰輪。飛沆瀣。霄漢萬里雲開。南極瑞占象緯。壽應三台。錦腸珠唾。鍾間氣卓犖天才。正暑有祥光照社。玉燕投懷。新堂深處。捧杯乍香。泛水芝空翠。風迴涼送。豔歌緩舞。醉墮瑤釵。長生難老。都道是柏葉仙階。笑傲且山中。宰相平地蓬萊。

千秋歲（壽）

相門出相。和氣濃春釀。傳家冠珮雲臺上。龐眉扶壽杖。綠髮披仙鬢。星兩兩。泰階已顯昇平象。玉砌蘭芽長。定向東風賞。添綵袖。褰羅幌。絲簧俱妙手。珠翠爭宮樣。江海量。年年醉裏翻新唱。

水龍吟（周緝領生朝）

水晶宮映長城。藕花萬頃開浮蘂。紅妝翠蓋。生朝時候。湖山搖曳。珠露爭圓。香風不斷。普熏沈水。似瑤池侍女。霞裾緩步。壽煙光裏。霖雨已沾千里。兆豐年。十分和氣。星郎綠鬢。錦波春釀。碧筩宜醉。荷葉還朝。青氈弈世。除書將至。看集龜戲葉。蟠桃著子。祝三千歲。

南鄉子（壽）

山寺輞川圖。霜葉雲林錦繡居。壽筵浮春珠翠擁。歡娛。滿院流泉繞綺疏。道氣自膚腴。几席

輕塵一點無。天要耆英修相業。清都已有泥書降玉除。

捲珠簾（壽）

祥景飛光盈袞繡。流慶崑臺。自是神仙冑。誰遣陽和放春透。化工重入丹青手。雲璈錦瑟爭爲壽。玉帶金魚共願人長久。偷取瑤桃薦芳酒。更看南極星朝斗。

醉蓬萊（壽）

對小春桃豔。曲室爐紅。乍寒天氣。七葉蓂開。應金章通貴。夢草銀鈞。燦花珠唾。是素來風味。滿腹經綸。回天議論。崑臺仙裔。祕殿陞華。紫樞勳舊。退步真祠。簡心端扆。迎日天元。聽正衙宣制。盡洗中原。徧爲霖雨。宴後堂歌吹。柏子千秋。丹砂九轉。今宵長醉。

隴頭泉

少年時。壯懷誰與重論。視文章真成小技。要知吾道稱尊。奏公車治安祕計。樂汕幕談笑從軍。百鎰黃金。一雙白璧。坐看同輩上青雲。事大謬。轉頭流落。徒走出修門。三十載。黃梁未熟。滄海揚塵。念向來浩歌獨往。故園松菊猶存。送飛鴻五絃寓目。望爽氣西山忘言。整頓乾坤。廊清宇宙。男兒此志會須伸。更有幾渭川垂釣。投考策奇勳。天難問。何妨袖手。且作閒人。

天仙子（三月十二日奉同蘇子陪富丈訪筠翁於舊居。遂爲杏花留飲。懷甚。命賦長短句。乃得天仙子寫呈。

兩公未章併發一笑。

樓外輕陰春澹佇。數點杏梢寒食雨。少年油壁記尋芳。梁苑路。今何處。千樹紅雲空夢去。驚見此花須折取。明日滿城傳侍女。情知醉裏惜花深。留春住。聽鶯語。一段風流天付與。

鵲橋仙

靚妝豔態。嬌波流盼。雙鬢橫渦半笑。尊前燭畔粉生光。更低唱。新翻轉調。花房結子。冰枝清瘦。醉依香濃寒峭。雖鶯新囀上林聲。驚夢斷。池塘春草。

漁父家風

八年不見荔枝紅。腸斷故園東。風枝露葉誰新採。悵望冷香濃。冰透骨。玉開容。想筠籠。今宵歸夢滿。頰天漿。更御冷風。

生查子

天生幾種香。風味因花見。旖旎透香肌。髣髴飛花片。雨潤惜餘熏。煙斷猶相戀。不似薄情人。濃淡分深淺。

減字木蘭花

客亭小會。可惜無歡容易醉。歸去更闌。細雨鳴窗一夜寒。昏然獨坐。舉世疏狂誰似我。強撥爐煙。也道今宵是上元。

眼兒嬌

蕭蕭疏雨滴梧桐。人在綺窗中。離愁徧繞，天涯不盡，卻在眉峯。
嬌波暗落相思淚，流破臉邊紅。可憐瘦似一枝春柳，不禁東風。

昭君怨

春院深深鶯語。花愁一簾煙雨。禁火已銷魂。更黃昏。
衾暖麝燈落地。雨過重門深夜。枕上百般猜。未歸來。

夜遊宮

半吐寒梅未折。雙魚洗冰漸初結。戶外明簾風任揭。擁紅爐。酒窗間。惟稷雪。比去年時節。道心事有人忺說。斗帳重熏。鴛被疊。酒微醺。管燈花。今夜別。
（稷一作雪。比去一作此日。）

楊柳枝（唐上次韻會韻玉）

深院今宵枕簟涼。獨花光。更籌何事促行觴。惱剛腸。
老去一囊煙雨裏。釣滄浪。看看鳴鳳向朝陽。且腰黃。

綵鸞歸令（爲張子安舞姬作）

珠履爭圍小立。春風趁拍底。態閑不管樂催伊。整朱衣。
粉融香潤隨人勸。玉困花嬌越樣宜。鳳城燈夜舊家時。數他誰。

江神子

夢中北去又南來。飽風埃。鬢華衰。浮水飛蓬。蹤跡爲誰催。自笑自悲還自語。一杯酒。鼻如雷。曉輿行處覺春回。屑瓊瑰。糝莓苔。病眼衝寒。欲閉又還開。水近人家籬落畔。遙認得。一枝梅。

西江月（和蘇庭藻）

小閣劣容老子。北窗仍遞南風。維摩丈室久空空。不與散花同夢。且作太真遊戲。未甘金粟龍鍾。憐君病後頰頰隆。識取小兒戲弄。

新衷情（余兒時不知有荔子。自呼爲紅荔。父母賞其名新。昔所未聞。殊靈形似之美。久欲記之。而因循。比

與諸公和長短句。故及之。以訴衷情。蓋里中推星毬紅鶴頂紅皆佳品。海舫便風。數日可到。）

兒時初未識方紅。學語問西東。對客呼爲紅蕊。此興已偏濃。嗟白首。抗塵容。費牢籠。星球何在。鶴頂長丹。誰寄南風。

採桑子（奉和秦楚村史君荔枝詞）

華堂清暑榕陰重。夢裏江寒。火齊星繁。興在冰壺玉井闌。風枝露葉誰新採。欲飽防慳。遺恨空槃。留取香紅滿地看。

菩薩蠻（送友人還富沙）

山城何歲無風雨。樓臺底事隨波去。歸棹望譙門。沙痕炯斷雲。詩成空弔古。想像經行處。陵谷有餘悲。舉觴澆別離。

又

微雲紅襯餘霞綺。明星碧浸銀河水。欹枕畫簷風。愁生草際蛩。雁行離塞晚。不道衡陽遠。歸恨隔重山。樓高莫凭闌。

浣溪紗（詠木香）

睡起中庭月未蹉。繁香隨影上輕羅。多情肯放一春過。比似雪時猶帶韻。不如梅處卻緣多。酒邊枕畔奈愁何。

好事近

華燭爛離觴。山吐四更寒月。公子唾花枝。玉盡一時豪傑。三冬闌若讀書燈。想見太清絕。紙帳地爐香暖。傲一窗風月。

南歌子

玉斧修圓了。冰輪分外清。共看星向繡衣明。元是生朝爲壽對難兄。鴻雁翻秋影。填簾和笑。聲。他年中令綵衣榮。記取今宵丹荔醉瑤觥。

醉花陰（詠木犀）

紫菊紅萸開犯早。獨占秋光老。醞造一般清。比著芝蘭。猶自爭多少。霜刀翦葉呈纖巧。手撚迎人笑。雲鬢一枝斜。小閣幽窗。是處都香了。

點絳脣

小雨愔晴。坐來池上荷珠醉。掉眉濃翠。怎不教人醉。美盼流觴。白鷺窺秋水。天然媚。大家休睡。笑倚西風裏。

花心動（七夕）

水館風亭。晚香濃一番菱荷新雨。簾枕乍閑。襟裾初試。散盡滿天神暑。斷雲卻送輕雷去。疎林外。玉鉤微吐。夜漸永。秋驚敗葉。涼生庭戶。天上佳期久阻。銀河畔。仙車縹緲雲路。舊怨未平。幽懣□駐。恨入半天風露。綺羅人散。金猊冷。醉魂到華胥深處。洞戶悄。南樓畫角自語。

暮山溪

一番小雨。陡覺添秋色。桐葉下銀牀。又送箇淒涼消息。故鄉何處。搔首對西風。衣線斷。帶圍寬。衰髮添新白。錢塘江上。冠蓋如雲積。騎馬傍朱門。誰肯念塵埃墨客。佳人信杳。日暮碧雲深。樓獨倚。鏡頻看。此意無人識。

踏莎行（別意·草堂別選）

芳草平沙。斜陽遠樹。無情桃葉江頭渡。醉來扶上木蘭舟。將愁不去。將人去。薄劣東風。天斜飛絮。明朝重覓吹笙路。碧雲香雨小樓空。春光已到銷魂處。

蘆川詞終

蘆川詞跋

仲宗別號蘆川居士。三山人。平生忠義自矢。不屑與奸佞同朝。飄然掛冠。紹興辛酉。胡澹庵上書乞斬秦檜。被謫。作賀新郎一闕送之。坐是與作詩王民瞻同除名。茲集以此詞壓卷。其旨微矣。人稱其長於悲憤。及讀花庵草堂所選。又極嫵媚之致。真堪與片玉白石並垂不朽。凡用字多有出處。如洒窗間惟稷雪云云。見毛詩疏。稷雪。霰也。形如米粒。能穿透瓦。今本改作霰雪。又如薄劣東風。天斜飛絮云云。見白香山詩。錢塘蘇小小。人道最天斜。自注天音歪。時刻改作顛斜。便無韻味。姑記之以爲妄改古人字句之戒云。古虞毛晉識。

宋六十名家詞